



DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda in Scholis Medicorum, die Jovis vigesimo-octavo,  
mensis Martii, anno Domini M. DCC. XLIII.*

M. BERNARDO DE JUSSIEU,  
Regiæ Scientiarum Academiæ, Regiæquæ Societatis Londinensis  
Socio & in Horto Regio Botanices Demonstratore, Doctore  
Medico, Præfide.

*An ut in Americâ, sic in hac regione Apalachines potus salubris?*

I.



UAM multiplex fit potulentorum genus, innumera plantarum  
species indicant: Diverso ex his partium delectu variantur. Illa  
ex radicibus, hæc è foliis parantur; nonnulla ex inciso caudice  
fluunt. Ista floribus, fructibus alia, alia feminibus, quædam ex in-  
tegrâ ipsamet herbâ conficiuntur. Ipse etiam parandi modus po-  
tuum varietatem augeat: aquam ferventem colore & sapore suo  
folia & flores faciliè imbuunt; coctione solâ, fapidas partes radices  
emittunt; cedit expressioni fructuum liquor; semina nisi contusa & humore irrorata  
lac, aut spiritus ardentis fermentatione præbere negant; nec herbæ totius nisi ma-

ceratione succum educes. Ratione tamen tam variâ parati potus simplicitatem non amittunt; quid si infusa succis, decocta liquoribus, destillata expressis permisceas? Quid si mixta melle aut saccharo condias, vel conditis aromatum suavitatem addideris? indè quot regionum tot ferè potulentorum species, ita ut suâ quæque gaudeat, sua cuique sufficiat, eaque ab integris jam sæculis alatur, reficiatur ac recreetur. Unicus tamen fuit in hæc sibi eligendâ, unicus in retinendâ finis, salubritas.

## I I.

**F**UNCTIONES animales perficit mutuus solidarum partium cum liquidis consensus; in eo posita est cujuslibet gentis de sanitate opinio. Hunc diversè pro cæli sui temperie, pro variâ alimentorum naturâ consequitur. Eadem in potulentorum usu ratio, cui opibus indigenis, sæpius providit natura: Aduktis sole populis sitim acidulorum fructuum succis sedare dedit; in septentrionalibus plagis, spirituosus ex Lupuli, Hordei, Mellis, Juniperi, Prunorum, Ceraforum, Vacciniorumque fermentatione extractis uti; temperatis climatibus, Uvarum, Pomorum, Pyrorumque liquorem concessit. Ad familiarem potulentorum quæ fermentatio concinnavit usum, accessit potus alius & alter è plantis spontè nascentibus solâ infusione paratus: Adeo increvit sanitatis desiderium! Inspissatum vitâ deside sanguinem ex calido Theæ suæ potu Sina diluit; dissolutum levi Oryzæ decocto Malabaribus in-  
crassat; viscerum obstructionibus à spiritu ardenti Arac (a) dicto, Indis communi; *Acmella* seu Bidente Zeilanico (b) Javanî occurrunt; Ex *Cassé* languidas vires Arabs reparat; habet suum *Cacao* Indus quo facilem chylum augeat; *Paraguay* suo alvum molliter ciet Peruvianus: Mexicani Ambrosiâ, Antillani nostri *Caprariâ* (c) sub Theæ specie aëris vitiorum impressionem corrigunt: Veronicæ infuso Germani stomachum, Galli salviâ cerebrum, Canadenses nostri Adianto suo pectus roborant. Quidni à vicinis, quidni à remotioribus una eademque regio potus suos mutuetur? Quidni ex ipsis omnium salubritatem sigillatim pro opportunitate eligendam exquirat? Rem præstitit apertum ubique terrarum & latè commercium, ulusque reciproci efficaciam probavit experientia.

(a) Uraqua Jacobi Bontii de Medicinâ Indorum. Lib. 2. cap. 4.

(b) Joannis Philippi Breynii. Dissert. 1700.

(c) *Capraria* Corallivica Cavetta Lusitanorum. Par. Bat. Geratiolæ affinis frutescens Americana foliis *Agerati*, seu *Veronicæ* erectæ majore Breynii. Prod. secundi & Hort. Amst. Part. prima fol. 79.

## I I I.

**Q**UANTA longiorum itinerum duci auri sacræ fami non debet Botanice! Quantum ex familiari cum populis alio sub sole positis convictu hygiene, non locupletata est! Tot varias inter potuum species salubrem unam imprimis suppeditat Florida, tellus vasti fluminis *Mississipi*, (a) nomine aliâs cognita, *Lodoiceo* (b) nunc insignita ob missas à Ludovico Magno colonias (c); apud *Apalaches* regionis hujusce gentem passim in sylvis nascitur nostræ Amygdali facie arbor, semper virens, apud indigenas *Cassine*, (d) *Apalachine* apud Gallos, *Agriifolii* (e) &

(a) Flumen illud detectum fuit à D. de la Salle ann. 1678.

(b) *La Louisiane*.

(c) Coloniz missæ sunt ann. 1683 & 1699.

(d) *Cassina* herba è cujus succo potionem consueunt in Floridâ, C. B. Pin. 170.

*Cassine* floridanorum arbuscula bacilifera Alaterni formæ facie, foliis alternatim sitis, tetraphyreno. Pluk. *Adans.*

(e) *Agriifolium* Carolinense, foliis dentatis, Baccis rubris, Catesby *Hist. Nat.* 31. Tab. 31.

*ilicis* (f) inter Botanicos recentiores nomina audit. Caudicis cortici ut & ramis cinereus inest color; ramulis fragilibus atro purpurascens. Vestuntur hi foliis ferè ovatis, oblongis, uncialibus & biuncialibus, carnosis, ramo pediculo purpurascente lineis tribus longo alternatim insitis, ad oras serratis ac leviter dentatis superne atro virentibus, inferne cinereis, ac nervo dilutiore & crassiore distinctis: Iis sapor statim herbaceus subinde acidulus ac amarus, qui deinceps in dulcem ac gratum abit. Exiguò flore gaudet roseo. Huic succedit bacca subrotunda, quatuor seminibus fecta. Renati Laudonerii (g) Galli secundæ expeditionis anno 1564. in Floridam ducis relatu, nobis innotuit hæc arbor, in Horto Regio exculsa, frigoris impatiens nec florèm, nec fructum edidit; nec arbusi altitudinem superavit. Barbari foliis in vas fictile candens injectis exsiccatisque aquam infundunt: Infusionem quam *Cassinam* vocant sorbent; sorbitionem iterum atque iterum singulis diebus repetunt: Consentientibusque de usu & virtute exploratoribus antiquis & recentioribus, incolumes se præstant; nec podagrâ, nec calculo ac nephritide attinguntur; Hispani vires potius experti (h) familiarem hunc sibi reddidère; similem efficaciam coloni nostri comprobant.

(f) *Ilex foliis ovato lanceolatis, serratis. Linn. H. Cliffort.*

(g) Vide Joannis de Laët, America: utriusque Descriptionis, pag. 109.

(h) Relicente Franc. Ximenes.

#### I V.

**A** PALACHINES præparationem docet, frequens apud nos salviæ Veronicæ, Adianti Canadensis ac Theæ foliorum usus. Strictior ejus textura fervidiorem lympham & longiorem in infundendo moram postulat, infusi efficaciam dilce, ex foliorum siccorum sapore amaro ac dulci: Ferventibus aqueis partibus penetrantur; harum ope amaro volatiles particulæ cellulas suas deserunt; viscosæ ac dulces extrahuntur, aqueis partibus miscentur; extracti copiam infusi color indicat: calidius epotum amaro volatilibus particulis spiritus animales illico recreat, cerebrum statim subit, dulcore levem amaricem subsequente, lenitur oris halitus, stomachus levatur, crudæ indigestæque carniæ reliquiæ emolliuntur, viscosæ inciduntur, aperiantur absque turbâ vasorum lacteorum ostia, cietur molliter & quandoque alvus, diluitur sanguis, solvitur lymphæ, intrlicantur salia acria, cedunt meatuum urinariorum obices, omnisque exitiosa calculorum saburra leniter excernitur. Quid plura? laboranti vesicæ occurrit, nephritin arcet, renibus exulceratis medetur, hydropem juvat, languidæque ac cachecticis reficit, hæc Apalaches ex hoc potu, similia Galli experiuntur.

#### V.

**Q**UIS rerum novarum osor, tam salubris potus usum impugnet? Quid obijciat? Barbarorum vescendi morem à nostro alienum? sylvestrium carniæ aut fumo exsiccatarum, vel malè coctarum escam stomacho noxiam? Num potius nocentior victus nostri ratio? Annon concoctu difficiliora sunt alimenta sale, pipere, aromatisque calidioribus condita, aut aceto indurata? Facilem ille Gallum dicet qui tanto potulentorum externorum numero quo jam tota scatet Gallia, novum addat; cum jam in Theæ, Paraguay & Canadensis Adianti infusis parem ferè sentiat effectum; cum suamet tellus plantas istis virtute congenere edat; ip-

fa Gale (a) Apalachini succedanea propinari possit; at quanto & saporis, quanto & odoris discrimine palatum afficiunt! Quàm diversè operantur! sudorem Thea, urinamque simul paulò acrius, hanc Apalachine alvumque sæpe sæpius ac lenius promover: Ex Adianti potu faucium quædam siccitas, ab Apalachine oris mador: ab eâ suavior halitus, ingratiore Gale potu: Sola Paraguay eam æmulatur, utraque quin sit eadem vix dubites; Nisi quæ contusa mittuntur folia, in integrum exhibita diversum esse arboris genus probent. Nevè quis Lodoicæos Cassinem suam voluptatis mage quàm salubritatis ergo sorbere opponat! Ita sit; an non gratius cum suavitate potu satiari, cujus quantitate non læditur cerebrum, animus exhilaratur, qui singulis convenit, qui à sopore senes excitat, qui adultis faniem sitimque sedando vegetiores eos, ad laboremque alacriores reddit, qui pueris voracibus alvum urinæque ciendo opitulatur, & singulari suâ redundantis feri copiam evacuandi virtute mulieribus prodest? cùm porro quæ alunt in Indiis plantæ, quæ in Oriente purgant, & quæ in Americâ febres pellunt, iisdem nostrâ in regione pollent viribus, quidni & Apalachine?

(a) Gale frutex odoratus Septentrionalium, J. B. 1. Part. 2. 225. Rhus Myrtifolia Belgica C. B. Pin. 414. & A&B. Acad. R. sc. 63, ann. 1706, *Viment Royal*.

*Ergo ut in Americâ, sic in hac regione Apalachines potus salubris.*

Proponēbat Parisiis, CLAUDIUS PERSON, Catalaunensis, Saluberrimæ  
Facultatis Medicinæ Parisiensis Baccalaureus. A. R. S. H. 1743.  
à sextâ ad meridiem,